

简体字本二十六史



吉林人民出版社

简体字本二十六史



卷二七下之上——卷三七

【汉】班 固 撰

【唐】颜师古 注

宋 超 等 标点

吉林人民出版社

汉书卷二七下之上

志第七下之上

五行下之上

传曰：“思之不睿，是谓不圣，厥咎霭，^①厥罚恒风，厥极凶短折。时则有脂夜之妖，时则有华孽，时则有牛祸，时则有心腹之疴，时则有黄眚黄祥，时则有金木水火沴土。”

①师古曰：“霭，音莫豆反。”

“思心之不睿，是谓不圣。”思心者，心思虑也；睿，宽也。孔子曰：“居上不宽，吾何以观之哉！”^①言上不宽大包容臣下，则不能居圣位。貌言视听，以心为主，四者皆失，区霭无识，^②故其咎霭也。雨旱寒奥，亦以风为本，^③四气皆乱，故其罚常风也。常风伤物，故其极凶短折也。伤人曰凶，禽兽曰短，中木曰折。^④一曰，凶，夭也；兄丧弟曰短，父丧子曰折。在人腹中，肥而包裹心者脂也，心区霭则冥晦，故有脂夜之妖。^⑤一曰，有脂物而夜为妖，若脂水夜污人衣，淫之象也。一曰，夜妖者，云风并起而杳冥，故与常风同象也。温而风则生螟螣，^⑥有裸虫之孽。^⑦刘向以为于《易》，《巽》为风为木，卦在三月四月，继阳而治，主木之华实。风气盛，至秋冬木复华，故有华孽。一曰，地气盛则秋冬复华。一曰，华者色也，土为内事，为女孽也。于《易》，《坤》为土为牛，牛大而心不能思虑，思心气毁，故有牛祸。一曰，牛多死，及为怪，亦是也。及人，则多病心腹者，故有心腹之疴。土色黄，故有黄眚黄祥。凡思心伤者病土气，土气病则金木水火沴之，故曰“时则有金木水火沴土”。不言“惟”而独曰“时则

有”者，非一冲气所沴，明其异大也。其极曰凶短折，顺之，其福曰考终命。^④刘歆思心传曰时则有裸虫之孽，谓螟螣之属也。庶征之常风，刘向以为《春秋》无其应。

①师古曰：“《论语》载孔子之言。”

②师古曰：“区，音口豆反。霏，音莫豆反。其下并同。”

③师古曰：“奥，音于六反。”

④师古曰：“中，古草字。”

⑤师古曰：“脂妖及夜妖。”

⑥师古曰：“螣，音徒得反，”

⑦师古曰：“裸，亦羸字也，从衣，果声。”

⑧师古曰：“寿考而终其命。”

釐公十六年“正月，六鵠退蜚，过宋都”。^①《左氏传》曰“风也”。刘歆以为风发于它所，至宋而高，鵠高蜚而逢之，则退。经以见者为文，故记退蜚；传以实应著，言风，常风之罚也。象宋襄公区霏自用，不容臣下，逆司马子鱼之谏，而与强楚争盟，^②后六年为楚所执，^③应六鵠之数云。京房《易传》曰：“潜龙勿用，^④众逆同志，至德乃潜，厥异风。其风也，行不解物，不长，^⑤雨小而伤。政悖德隐兹谓乱，厥风先风不雨，大风暴起，发屋折木。守义不进兹谓老，厥风与云俱起，折五谷茎。臣易上政，兹谓不顺，厥风大焱发屋。^⑥赋敛不理兹谓祸，厥风绝经纪。^⑦止即温，温即虫。侯专封兹谓不统，厥风疾，而树不摇，谷不成。辟不思道利，兹谓无泽，^⑧厥风不摇木，旱无云，伤禾。公常于利兹谓乱，^⑨厥风微而温，生虫蝗，害五谷。弃正作淫兹谓惑，厥风温，螟虫起，害有益人之物。侯不朝兹谓叛，厥风无恒，地变赤而杀人。”

①师古曰：“鵠，音五狄反。”

②师古曰：“子鱼，公子目夷也，桓公之子，而为司马。争盟，谓为鹿上之盟，以求诸侯于楚。子鱼谏曰：‘小国争盟，祸也。’公不听之。”

③师古曰：“僖二十一年，楚执宋公以伐宋，距六鵠退飞凡六年。”

④师古曰：“《乾》初九爻辞。”

⑤师古曰：“不解物，谓物逢之而不解散也。不长，所起者近也。”

⑥师古曰：“焱，疾风也，音必遥反。”

⑦如淳曰：“有所破坏，绝匹帛之属也。”晋灼曰：“南北为经，东西为纬，丝因风暴，乱不端理也。”

⑧师古曰：“道，读曰导。不思导示于下而安利之。”

⑨师古曰：“公，上爵也。常于利，谓心常求利也。”

文帝二年六月，淮南王都寿春大风毁民室，杀人。刘向以为是岁南越反，攻边，淮南王长破之，后年入朝，杀汉故丞相辟阳侯，上赦之，归聚奸人，谋逆乱，自称东帝，见异不寤，后迁于蜀，道死靡。

文帝五年，吴暴风雨，坏城官府民室。时吴王濞谋为逆乱，天戒数见，终不改寤，后卒诛灭。

五年十月，楚王都彭城，大风从东南来，毁市门，杀人。是月，王戊初嗣立，后坐淫削国，与吴王谋反，刑僇谏者。^①吴在楚东南，天戒若曰，勿与吴为恶，将败市朝。王戊不寤，卒随吴亡。

①师古曰：“谓楚相张敖、太傅赵夷吾也。僇，古戮字。下皆类此。”

昭帝元凤元年，燕王都蓟大风雨，^①拔宫中树七围以上十六枚，坏城楼。燕王旦不寤，谋反发觉，卒伏其辜。

①师古曰：“蓟，县名，燕国之所都。”

釐公十五年“九月己卯晦，震夷伯之庙。”^①刘向以为晦，暝也；震，雷也。夷伯，世大夫，正昼雷，其庙独冥。^②天戒若曰，勿使大夫世官，将专事暝晦。明年，公子季友卒，果世官，^③政在季氏。至成公十六年“六月甲午晦”，正昼皆暝，阴为阳，臣制君也。成公不寤。其冬，季氏杀公子伋。^④季氏萌于釐公，^⑤大于成公，此其应也。董仲舒以为夷伯，季氏之孚也，^⑥陪臣不当有庙。震者雷也，晦暝，雷击其庙，明当绝去僭差之类也。向又以为此皆所谓夜妖者也。刘歆以为《春秋》及朔言朔，及晦言晦，人道所不及，则天震之。展氏有隐愿，故天加诛于其祖夷伯之庙以谴责之也。

①师古曰：“夷伯，司空无骇之后，本鲁公族也，号展氏。”

②师古曰：“冥，暗也。”

③师古曰：“谓季友之孙行父仍执政专国，自此以后常为卿。”

④师古曰：“为季文子所杀也。已解于上。”

⑤师古曰：“萌，喻草木始生也。言其始有威权。”

⑥师古曰：“孚，信也。所信任之臣也。”

成公十六年“六月甲午晦，晋侯及楚子、郑伯战于鄢陵”。皆月晦云。

隐公五年“秋，螟”。董仲舒、刘向以为时公观渔于棠，贪利之应也。①刘歆以为又逆臧蒚伯之谏，②贪利区霭，以生裸虫之孽也。

①师古曰：“棠，鲁地也。陈渔者之事而观之也。”

②师古曰：“臧蒚伯，公子驱也，孝公之子，谏观渔。”

八年“九月，螟”。时郑伯以郕将易许田，①有贪利心。京房《易传》曰：“臣安禄兹谓贪，厥灾虫，虫食根。德无常兹谓烦，虫食叶。不纯无德，虫食本。与东作争，兹谓不时，②虫食节。蔽恶生孽，虫食心。”③

①师古曰：“郑祀泰山之邑也，音彼命反。已解于上。”

②师古曰：“夺农时也。”

③师古曰：“蔽，谓恶人蔽君之明为灾孽也。”

严公六年“秋，螟”。董仲舒、刘向以为先是卫侯朔出奔齐，齐侯会诸侯纳朔，①许诸侯赂。②齐人归卫宝，鲁受之，③贪利应也。

①师古曰：“朔，谓惠公也。桓十六年，以左公子泄、右公子职立公子黔牟，故惠公奔齐。至庄五年，会齐人、宋人、蔡人伐卫，而纳惠公也。”

②师古曰：“诸国各有赂。”

③师古曰：“以伐卫所获之宝来归鲁。”

文帝后六年秋，螟。是岁，匈奴大入上郡、云中，烽火通长安，遣三将军屯边，三将军屯京师。①

①师古曰：“并曰解于上。”

宣公三年，“郊牛之口伤，改卜牛，牛死”。刘向以为近牛祸也。是时，宣公与公子遂谋共杀子赤而立，①又以丧娶，②区霭昏乱。乱成于口，幸有季文子得免于祸，天犹恶之，生则不飨其祀，③死则灾

燔其庙。④董仲舒指略同。

①师古曰：“已解于上。”

②师古曰：“宣元年正月，公子遂如齐逆女。二月，遂以夫人妇姜至自齐，时成公丧制未除。”

③师古曰：“谓郊牛伤死，是天不欲殽其祀。”

④师古曰：“成三年，新宫灾。新宫者，宣之庙也，以其新成，故谓之新宫。”

秦孝文王五年，旃胸衍，有献五足牛。①刘向以为近牛祸也。先是，文惠王初都咸阳，广大宫室，南临渭，北临泾，思心失，逆土气。足者止也，戒秦建止奢泰，将致危亡。②秦遂不改，至于离宫三百，复起阿房，未成而亡。一曰，牛以力为人用，足所以行也。其后，秦大用民力转输，起负海至北边，③天下叛之。京房《易传》曰：“兴繇役，夺民时，厥妖牛生五足。”

①师古曰：“胸衍，地名，在北地。胸，音许于反。”

②如淳曰：“建立基止。泰，奢泰。”

③师古曰：“负海，犹言背海也。”

景帝中六年，梁孝王田北山，有献牛，足上出背上。刘向以为近牛祸。先是，孝王骄奢，起苑方三百里，宫馆阁道相连三十余里。纳于邪臣羊胜之计，欲求为汉嗣，刺杀议臣爰盎，事发，负斧归死。既退归国，犹有恨心，内则思虑籍乱，外则土功过制，故牛祸作。足而出于背，下奸上之象也。①犹不能自解，发疾暴死，又凶短之极也。

①师古曰：“奸，犯也，音干。”

《左氏传》昭公二十一年春，周景王将铸无射钟，①泠州鸠曰：②“王其以心疾死乎！夫天子省风以作乐，③小者不寃，大者不擗。④擗则不容，心是以感，感实生疾。今钟擗矣，王心弗戒矣，⑤其能久乎？”刘向以为是时景王好听淫声，適庶不明，⑥思心籍乱，明年以心疾崩，近心腹之疴，凶短之极者也。

①师古曰：“钟声中无射之律也。射，音弋石反。”

②应劭曰：“泠，官也。州鸠，名也。”师古曰：“乐官曰泠，后遂以为氏。泠，音零，其字从水。”

③应劭曰：“风，土地风俗也。省中和之风以作乐，然后可移恶风易恶俗也。”臣瓚曰：“省风俗之流通，作乐以教其散也。”师古曰：“应说是也。省，观也。”

④师古曰：“窕，轻小也。颡，横大也。窕，音它尧反。颡，音胡化反。”

⑤孟康曰：“古堪字。”

⑥师古曰：“適，读曰嫡。谓太子寿卒，王立子猛为嗣，后又欲立子朝也。”

昭二十五年春，鲁叔孙昭子聘于宋，元公与燕，饮酒乐，语相泣也。①乐祁佐，②告人曰：“今兹君与叔孙其皆死乎！吾闻之，哀乐而乐哀，皆丧心也。”③心之精爽，是谓魂魄；魂魄去之，何以能久？”冬十月，叔孙昭子死；十一月，宋元公卒。

①师古曰：“昭子，叔孙婼也。元公，宋平公子也。相泣，相对而俱泣也。”

②师古曰：“乐祁，宋司城子梁也。佐，佐酒。”

③师古曰：“哀乐，可乐而反哀也。乐哀，可哀而反乐也。丧，失之也。”

昭帝元凤元年九月，燕有黄鼠衔其尾舞王宫端门中，往视之，鼠舞如故。王使夫人以酒脯祠，鼠舞不休，夜死。黄祥也。时燕刺王旦谋反将败，死亡象也。其月，发觉，伏辜。京房《易传》曰：“诛不原情，厥妖鼠舞门。”

成帝建始元年四月辛丑夜，西北有如火光。壬寅晨，大风从西北起，云气赤黄，四塞天下，终日夜下著地者，黄土尘也。是岁，帝元舅大司马大将军王凤始用事；又封凤母弟崇为安成侯，食邑万户；庶弟谭等五人赐爵关内侯，食邑三千户。①复益封凤五千户，悉封谭等为列侯，是为五侯。哀帝即位，封外属丁氏、傅氏、周氏、郑氏凡六人为列侯。②杨宣对曰：“五侯封日，天气赤黄，丁、傅复然。”③此殆爵土过制，伤乱土气之祥也。”京房《易传》曰：“经称‘观其生’，④言大臣之义，当观贤人，知其性行，推而贡之，否则为闻善不与，兹谓不知，⑤厥异黄，厥咎聋，厥灾不嗣。黄者，日上黄光不散如火然，有黄浊气四塞天下。蔽贤绝道，故灾异至绝世也。经曰‘良马逐’。⑥逐，进也，言大臣得贤者谋，当显进其人，否则为下相攘善，⑦兹谓盗明，厥咎亦不嗣，至于身僂家绝。”⑧

①师古曰：“谭、商、音、根、逢时，凡五人。”

②师古曰：“《外戚传》傅太后弟子喜封高武侯，晏封孔乡侯，商封汝昌侯，同母弟子郑业为阳信侯，丁太后兄明封阳安侯，子满封平周侯。傅氏、郑氏侯者四人，丁氏侯者二人。今此言六人为列侯，其数是也。傅氏、丁氏、郑氏则有之，而不见周氏所出。志传不同，未详其意。”

③服虔曰：“杨宣，谏大夫也。”

④师古曰：“《易·观卦》上九爻辞。”

⑤师古曰：“徒知之而已，不能进助也。”

⑥师古曰：“此《易·大畜》九三爻辞。”

⑦师古曰：“攘，却也。言不进达之也。一曰：攘，因也。因而窃取曰攘，音人羊反。”

⑧师古曰：“傖，古戮字。”

史记周幽王二年，周三川皆震。^①刘向以为金木水火沴土者也。伯阳甫曰：^②“周将亡矣！天地之气不过其序，若过其序，民乱之也。阳伏而不能出，阴迫而不能升，^③于是有地震。今三川实震，是阳失其所而填阴也。^④阳失而在阴，原必塞；^⑤原塞，国必亡。夫水，土演而民用也；^⑥土无所演，而民乏财用，不亡何待？昔伊雒竭而夏亡，河竭而商亡，今周德如二代之季，其原又塞，塞必竭；川竭，山必崩。夫国必依山川，山崩川竭，亡之征也。若国亡，不过十年，数之纪也。”是岁，三川竭，岐山崩。刘向以为阳失在阴者，谓火气来煎枯水，故川竭也。山川连体，下竭上崩，事势然也。时幽王暴虐，妄诛伐，不听谏，迷于褒姒，废其正后，^⑦废后之父申侯与犬戎共攻杀幽王。一曰，其在天文，水为辰星，辰星为蛮夷。月食辰星，国以女亡。幽王之败，女乱其内，夷攻其外。京房《易传》曰：“君臣相背，厥异名水绝。”^⑧

①应劭曰：“震，地震三川竭也。”师古曰：“三川，泾、渭、洛也。洛即漆沮也。川自震耳，故将壅塞，非地震也。”

②服虔曰：“周太史。”

③应劭曰：“迫，阴迫阳，使不能升也。”

④应劭曰：“失其所，失其道也。填阴，为阴所填，不得升也。”师古曰：“填，

音竹刃反。”

⑤师古曰：“原，谓水泉之本也。”

⑥应劭曰：“演，引也，所以引出土气者也。”师古曰：“演，音衍。”

⑦师古曰：“褒姒，褒人所献之女也。正后，申后也。盖《白华》之诗所为作也。”

⑧师古曰：“有名之水。”

文公九年“九月癸酉，地震”。刘向以为先是时齐桓、晋文、鲁釐二伯贤君新没，①周襄王失道，②楚穆王杀父，③诸侯皆不肖，权倾于下。天戒若曰，臣下强盛者将动为害。后宋、鲁、晋、莒、郑、陈、齐皆杀君。④诸震略，皆从董仲舒说也。京房《易传》曰：“臣事虽正，专必震。其震，于水则波，于木则摇，于屋则瓦落。大经在辟而易臣，兹谓阴动，⑤厥震摇政宫。大经摇政，兹谓不阴，厥震摇山，山出涌水。嗣子无德专禄，兹谓不顺，厥震动丘陵，涌水出。”

①师古曰：“齐桓、晋文，二伯也。鲁僖，贤君也。伯，读曰霸。”

②师古曰：“谓避叔带之难而出奔，失为君之道。”

③师古曰：“穆王，商臣也，杀其父成王也。”

④师古曰：“文十六年宋人杀其君杵臼，十八年襄仲杀恶，宣二年晋赵盾杀其君夷皋，文十八年莒弑其君庶其，宣四年郑公子归生弑其君夷，十年陈夏徵舒杀其君平国，文十八年齐人杀其君商人。”

⑤服虔曰：“经，常也。辟，音刑辟之辟。”苏林曰：“大经，五行之常经也。在辟，众阴犯杀其上也。”师古曰：“辟，读曰僻。谓常法僻坏而易臣也。”

襄公十六年“五月甲子，地震”。刘向以为先是鸡泽之会，诸侯盟，大夫又盟。①是岁三月，诸侯为溴梁之会，而大夫独相与盟，②五月地震矣。其后崔氏专齐，桀盈乱晋，良霄倾郑，阍杀吴子，燕逐其君，楚灭陈、蔡。③

①师古曰：“鸡泽，卫地也。襄三年，公会单子、晋侯、宋公、卫侯、郑伯、莒子、邾子、齐世子光，己未，同盟于鸡泽。陈侯使袁侨如会，戊寅，叔孙豹及诸侯大夫及陈袁侨盟也。”

②师古曰：“经书诸大夫盟，谓晋、宋、卫、郑、曹、莒、邾、薛、杞、小邾之大夫。”

③师古曰：“崔氏，齐卿崔杼也。桀盈，晋大夫桀桓子之子怀子也，二十一

年奔楚，二十三年复入于晋而作乱。良霄，郑大夫伯有也。三十年，子皙以驷氏之甲伐而焚之，伯有奔靡梁，遂奔许，展自墓门之夷入，介于襄库，以伐旧北门。驷带率国人伐之，伯有死于羊肆。闾，守门者也。吴子，餘祭也。吴人伐越，获俘焉，以为闾，使守舟。二十九年，餘祭观舟，闾以刀杀之。燕，北燕国也。昭三年冬，燕大夫杀公之外嬖，公惧奔齐。昭八年，楚师灭陈。十一年，楚灭蔡也。”

昭公十九年“五月己卯，地震”。刘向以为是时季氏将有逐君之变。其后宋三臣、曹会皆以地叛，^①蔡、莒逐其君，吴败中国，杀二君。^②

①师古曰：“二十年，宋华亥、向宁、华定出奔陈，二十一年自陈入于宋南里以叛。曹会，大夫公孙会也，二十年自鄆出奔宋。《谷梁传》曰‘自鄆者，专鄆也’。鄆，会之邑也。鄆，音莫风反。”

②师古曰：“昭二十一年，蔡人信费无极之言，出蔡侯朱，朱出奔楚。二十三年，莒子庚舆虐而好剑，国人患之。秋七月，乌存帅国人以逐之，庚舆出奔鲁。戊辰，吴败楚、顿、胡、沈、蔡、陈、许之师于鸡父，胡子髡、沈子逞灭，是也。”

二十三年“八月乙未，地震”。刘向以为是时周景王崩，刘、单立王子猛，尹氏立子朝。^①其后季氏逐昭公，黑肱叛邾，^②吴杀其君僚，^③宋五大夫、晋二大夫皆以地叛。^④

①师古曰：“已解于上。”

②师古曰：“黑肱，邾大夫也。三十一年，经书‘邾黑肱以滥来奔’。滥，邾邑。”

③师古曰：“二十七年，吴公子光使专诸抽剑刺王是也。”

④师古曰：“定十年，宋公之弟辰暨仲它、石弳出奔陈。十一年春，辰及仲它、石弳、公子地自陈入于萧以叛。秋，宋乐大心自曹入于萧。十三年，晋荀寅、士吉射入朝歌以叛。”

哀公三年“四月甲午，地震”。刘向以为是时诸侯皆信邪臣，莫能用仲尼，盗杀蔡侯，齐陈乞弑君。^①

①师古曰：“哀四年，经书‘盗杀蔡侯申’。《左氏传》曰：‘蔡昭侯将如吴，诸大夫恐其又迁也，公孙翩逐而射之，入于人家而卒。’陈乞，齐大夫陈僖子也。六年，乞杀其君荼。荼，景公之子安孺子也。荼，音大胡反。”

惠帝二年正月，地震陇西，厌四百余家。^①武帝征和二年八月癸亥，地震，厌杀人。宣帝本始四年四月壬寅，地震河南以东四十九郡，北海、琅邪坏祖宗庙城郭，杀六千余人。元帝永光三年冬，地震。绥和二年九月丙辰，地震，自京师至北边郡国三十余坏城郭，凡杀四百一十五人。

①师古曰：“厌，音一甲反。次下亦同。”

釐公十四年“秋八月辛卯，沙麓崩”。《谷梁传》曰：“林属于山曰麓。^①沙，其名也。”刘向以为臣下背叛，散落不事上之象也。先是，齐桓行伯道，会诸侯，^②事周室。管仲既死，桓德日衰。天戒若曰，伯道将废，诸侯散落，政逮大夫，陪臣执命，臣下不事上矣。桓公不寤，天子蔽晦。^③及齐桓死，天下散而从楚。王札子杀二大夫，^④晋败天子之师，^⑤莫能征讨，从是陵迟。《公羊》以为沙麓，河上邑也。董仲舒说略同。一曰，河，大川象，齐，大国；桓德衰，伯道将移于晋文，故河为徙也。《左氏》以为沙麓，晋地；沙，山名也；地震而麓崩，不书震，举重者也。伯阳甫所谓“国必依山川，山崩川竭，亡之征也；不过十年，数之纪也。”至二十四年，晋怀公杀于高粱。^⑥京房《易传》曰：“小人剥庐，^⑦厥妖山崩，兹谓阴乘阳，弱胜强。”

①师古曰：“属，联也，音之欲反。”

②师古曰：“伯，读曰霸。其下亦同。”

③师古曰：“被，掩蔽而暗也。”

④师古曰：“二大夫，召伯、毛伯也。”

⑤师古曰：“谓败之于晋戎也。已解于上也。”

⑥师古曰：“怀公，谓子圉，惠公之子也。文公入国而使杀之。高粱，晋地。”

⑦师古曰：“《剥》卦上九爻之辞。”

成公五年“夏，梁山崩”。《谷梁传》曰“靡河三日不流”，^①晋君帅群臣而哭之，乃流。^②刘向以为山阳，君也，水阴，民也。天戒若曰，君道崩坏，下乱百姓，将失其所矣。哭然后流，丧亡象也。梁山在晋地，自晋始而及天下也。后晋暴杀三卿，厉公以弑，^③湫梁之会，天

下大夫皆执国政，^④其后孙、宁出卫献，^⑤三家逐鲁昭，单、尹乱王室。^⑥董仲舒说略同。刘歆以为梁山，晋望也；崩，弛崩也。^⑦古者三代命祀，祭不越望，吉凶祸福，不是过也。国主山川，山崩川竭，亡之征也，美恶周必复。^⑧是岁，岁在鹑火，至十七年复在鹑火，桀书、中行偃杀厉公而立悼公。

①师古曰：“靡，读曰壅。”

②师古曰：“从伯宗用辇者之言。”

③师古曰：“三卿，谓郤犨、郤锜、郤至也。厉公杀之，而桀书、中行偃又弑厉公。事在成十七年。”

④师古曰：“并解于上。”

⑤师古曰：“孙，孙林父。宁，宁殖。皆卫大夫也。卫献公，定公之子也，名衎。献公戒二子食，日旰不召，而射鸿于圃，二子怒，因作乱。公如鄆，遂出奔齐，孙氏追之，败公徒于柯泽。事在襄十四年。”

⑥师古曰：“并解于上。”

⑦师古曰：“言渐解散也。弛，音式尔反。”

⑧师古曰：“复，音扶目反。”

高后二年正月，武都山崩，杀七百六十人，地震至八月乃止。文帝元年四月，齐楚地山二十九所同日俱大发水，溃出，刘向以为近水渗土也。天戒若曰，勿盛齐楚之君，今失制度，将为乱。后十六年，帝庶兄齐悼惠王之孙文王则薨，无子，帝分齐地，立悼惠王庶子六人皆为王。^①贾谊、晁错谏，以为违古制，恐为乱。至景帝三年，齐楚七国起兵百余万，汉皆破之。春秋四国同日灾，^②汉七国同日众山溃，咸被其害，不畏天威之明效也。

①师古曰：“谓齐孝王将闾、济北王志、菑川王贤、胶东王雄渠、胶西王卬、济南王辟光。”

②师古曰：“宋、卫、陈、郑”

成帝河平三年二月丙戌，犍为柏江山崩，捐江山崩，皆靡江水，^①江水逆流坏城，杀十三人，地震积二十一日，百二十四动。元延三年正月丙寅，蜀郡岷山崩，靡江，江水逆流三日乃通。刘向以为周时岐山崩，三川竭，而幽王亡。岐山者，周所兴也。汉家本起于蜀

汉，今所起之地山崩川竭，星孛又及摄提、大角，从参至辰，^②殆必亡矣。其后三世亡嗣，王莽篡位。

①师古曰：“靡，读曰壅。次下亦同。”

②如淳曰：“孛星尾长及摄提、大角，始发于参至辰也。”

传曰：“皇之不极，是谓不建，厥咎眊，^①厥罚恒阴，厥极弱。时则有射妖，时则有龙蛇之孽，时则有马祸，时则有下人伐上之疴，时则有日月乱行，星辰逆行。”

①服虔曰：“眊，音耄。”

“皇之不极，是谓不建”，皇，君也。极，中；建，立也。人君貌言视听思心五事皆失，不得其中，则不能立万事，失在眊悖，故其咎眊也。^①王者自下承天理物，云起于山，而弥于天；^②天气乱，故其罚常阴也。一曰，上失中，则下强盛而蔽君明也。《易》曰“亢龙有悔，贵而亡位，高而亡民，贤人在下位而亡辅”，^③如此，则君有南面之尊，而亡一人之助，故其极弱也。盛阳动进轻疾。^④礼，春而大射，以顺阳气。^⑤上微弱则下奋动，故有射妖。易曰：“云从龙”，^⑥又曰“龙蛇之蛰，以存身也”。^⑦阴气动，故有龙蛇之孽。于《易》，《乾》为君为马，马任用而强力，君气毁，故有马祸。一曰，马多死及为怪，亦是也。君乱且弱，人之所叛，天之所去，不有明王之诛，则有篡弑之祸，故有下人伐上之疴。凡君道伤者病天气，不言五行沴天，而曰“日月乱行，星辰逆行”者，为若下不敢沴天，犹《春秋》曰“王师败绩于贸戎”，不言败之者，以自败为文，尊尊之意也。刘歆皇极传曰有下体生上之疴。说以为下人伐上，天诛已成，不得复为疴云。皇极之常阴，刘向以为《春秋》亡其应。一曰，久阴不雨是也。刘歆以为自属常阴。

①师古曰：“眊，不明也。悖，惑也，音布内反。”

②师古曰：“弥，满也。”

③师古曰：“《乾》上九文言也。”

④服虔曰：“阳行轻且疾也。”

⑤韦昭曰：“将祭，与群臣射，谓之大射。”

⑥师古曰：“《乾》九五文言。”

⑦师古曰：“《下系》辞也。”

昭帝元平元年四月崩，亡嗣，立昌邑王贺。贺即位，天阴，昼夜不见日月。贺欲出，光禄大夫夏侯胜当车谏曰：“天久阴而不雨，臣下有谋上者，陛下欲何之？”贺怒，缚胜以属吏，^①吏白大将军霍光。光时与车骑将军张安世谋欲废贺。光让安世，以为泄语，安世实不泄，召问胜。胜上《洪范五行传》曰：“‘皇之不极，厥罚常阴，时则有下人伐上。’不敢察察言，^②故云臣下有谋。”光、安世读之，大惊，以此益重经术士。后数日卒共废贺，此常阴之明郊也。京房《易传》曰：“有霓、蒙、雾。雾，上下合也。蒙如尘云。霓，日旁气也。其占曰：后妃有专，霓再重，赤而专，至冲旱。^③妻不壹顺，黑霓四背，又曰霓双出日中。妻以贵高夫，兹谓擅阳，霓四方，日光不阳，解而温。^④内取兹谓禽，^⑤霓如禽，在日旁。以尊降妃，兹谓薄嗣，霓直而塞，六辰乃除，夜星见而赤。^⑥女不变始，兹谓乘夫。^⑦霓白在日侧，黑霓果之，气正直。^⑧妻不顺正，兹谓擅阳，霓中窥贯而外专。夫妻不严兹谓媒，^⑨霓与日会。妇人擅国兹谓顷，^⑩霓白贯日中，赤霓四背。^⑪適不答兹谓不次，^⑫霓直在左，霓交在右。取于不专，兹谓危嗣，霓抱日两未及。君淫外兹谓亡，霓气左日交于外。取不达兹谓不知，霓白夺明而大温，温而雨。^⑬尊卑不别兹谓媒，霓三出三已，三辰除，^⑭除则日出且雨。臣私禄及亲，兹谓罔辟。^⑮厥异蒙，其蒙先大温，已蒙起，日不见。行善不请于上，兹谓作福，蒙一日五起五解。辟不下谋，臣辟异道，兹谓不见，上蒙下雾，风三变而俱解。立嗣子疑，兹谓动欲，蒙赤，日不明。德不序兹谓不聪，蒙，日不明，温而民病。德不试，空言禄，^⑯兹谓主窳臣夭，^⑰蒙起而白。君乐逸人兹谓放，蒙，日青，黑云夹日，左右前后行过日。公不任职，兹谓怙禄，蒙三日，又大风五日，蒙不解。利邪以食，兹谓闭上，蒙大起，白云如山行蔽日。公惧不言道，兹谓闭下，蒙大起，日不见，若雨不雨，至十二日

解，而有大云蔽日。禄生于下，兹谓诬君，蒙微而小雨，已乃大雨。下相攘善，兹谓盗明，蒙黄浊。下陈功求于上，兹谓不知，蒙，微而赤，风鸣条，解复蒙。下专刑兹谓分威，蒙而日不得明。大臣厌小臣兹谓蔽，蒙微，日不明，若解不解，大风发，赤云起而蔽日。众不恶兹谓闭，蒙，尊卦用事，^⑩三日而起，日不见。漏言亡喜，兹谓下厝用，^⑪蒙微，日无光，有雨云，雨不降。废忠惑佞兹谓亡，蒙，天先清而暴，蒙微而日不明。有逸民兹谓不明，蒙浊，夺日光。公不任职，兹谓不绌，蒙白，三辰止，则日青，青而寒，寒必雨。忠臣进善君不试，兹谓遏，^⑫蒙，先小雨，雨已蒙起，微而日不明。惑众在位，兹谓覆国，蒙微而日不明，一温一寒，风扬尘。知佞厚之兹谓庠，蒙甚而温。君臣故弼兹谓悖，^⑬厥灾风雨雾，风拔木，乱五谷，已而大雾。庶正蔽恶，兹谓生孽灾，厥异雾。”此皆阴云之类云。

①师古曰：“属，委也，音之欲反。”

②臣瓚曰：“不敢察察明言之。”

③孟康曰：“专，员也。若五月再重，赤而员，至十一月旱也。”

④服虔曰：“蒙气解而温。”

⑤服虔曰：“人君内淫于骨肉也。”臣瓚曰：“人君取于国中也。”师古曰：“取，如《礼记》‘聚麀’之聚。瓚说非。”

⑥韦昭曰：“六辰，谓从卯至申。”

⑦孟康曰：“始贵高于夫，终行此不变也。”

⑧师古曰：“果，谓干之也。”

⑨韦昭曰：“燥，言燥慢也。”师古曰：“音先列反。”

⑩师古曰：“顷，读曰倾。”

⑪服虔曰：“覓背日。”

⑫服虔曰：“言適妻不见答也。”臣瓚曰：“夫不接妻为不答。”师古曰：“適，读曰嫡。答，报也。言妻有承顺之心，不见报答也。一曰，答，对也。言不以恩意接对之。”

⑬师古曰：“取，读曰聚。”

⑭韦昭曰：“若从寅至辰也。覓旦见西，晏则雨。”

⑮韦昭曰：“辟，君也。”师古曰：“辟，音壁。其下并同。”

⑮师古曰：“试，用也。”

⑯孟康曰：“谓君情窳，用人不以次第，为天也。”师古曰：“窳，音庾。”

⑰孟康曰：“尊卦，《乾》、《坤》也。”臣瓚曰：“京房谓之方伯卦，《震》、《兑》、《坎》、《离》也。”师古曰：“孟说是。”

⑱师古曰：“厝，音千各反。”

⑲师古曰：“试，用也。”

⑳师古曰：“弼，犹相戾也。悖，惑也。”

严公十八年“秋，有蜮”。刘向以为蜮生南越。越地多妇人，男女同川，淫女为主，乱气所生，故圣人名之曰蜮。蜮犹惑也，在水旁，能射人，射人有处，甚者至死。^①南方谓之短弧，^②近射妖，死亡之象也。时严将取齐之淫女，故蜮至。天戒若曰，勿取齐女，将生淫惑篡弑之祸。严不寤，遂取之。入后淫于二叔，二叔以死，两子见弑，夫人亦诛。^③刘歆以为蜮，盛暑所生，非自越来也。京房《易传》曰：“忠臣进善君不试，厥咎国生蜮。”^④

①师古曰：“以气射人也。”

②师古曰：“即射工也，亦呼水弩。”

③师古曰：“并解于上。”

④师古曰：“试，用也。”

史记鲁哀公时，有隼集于陈廷而死，^①楛矢贯之，^②石弩，^③长尺有咫。^④陈闵公使使问仲尼，^⑤仲尼曰：“隼之来远矣！昔武王克商，通道百蛮，使各以方物来贡，肃慎贡楛矢，^⑥石弩长尺有咫。先王分异姓以远方职，使毋忘服，^⑦故分陈以肃慎矢。”试求之故府，果得之。^⑧刘向以隼近黑祥，贪暴类也；矢贯之，近射妖也；死于廷，国亡表也。象陈眊乱，不服事周，^⑨而行贪暴，将致远夷之祸，为所灭也。是时，中国齐、晋，南夷吴、楚为强，^⑩陈交晋不亲，附楚不固，数被二国之祸。后楚有白公之乱，^⑪陈乘而侵之，^⑫卒为楚所灭。^⑬

①师古曰：“隼，鸷鸟，即今之鸩也。说者以为鸩，失之矣。廷，朝廷也。鸩字，音胡骨反。”